



**Na Elder David A. Bednar**  
No te Pūpū no te Tino Ahuru Ma Piti Aposetolo

# Faaoromai i te mau ati ma te paruparu ore

*Na te mau hopoi'a teimaha i roto i to tatou oraraa e tauturu ia tatou ia ti'aturi i ni'a i te mana, te aroha e te maitai no te Mesia Mo'a.*

**T**e vai ra to'u hoê hoa rahi roa, i te mau matahiti matamua o to'na faaiipoioraa, ua faaoti oia e, titauhia no'na e no to'na utuafare te hoê pereoo pani e maha huiira tura'i. Ua papû roa i ta'na vahine e, aita e titauhia te hoê pereoo mai te reira, ua hinaaro noa râ ta'na tane hoê pereoo apî. I roto i te hoê tau'araa parau area-rea rii i rotopu i teie tane e te vahine faaiipoipo, ua haamata a'era raua i te feruri i te vahi faufaa e i te vahi faufaa ore o teie hooraa pereoo.

« Hani, e mea ti'a ia taua ia hoo mai i te hoê pereoo pani maha huiira tura'i ».

Ui atura te vahine e, « Eaha oe i feruri ai e, e hinaaro taua i te hoê pereoo pani apî? »

Ua pahono atura oia i te uiraa a te vahine ma te feruri e, o te pahonora maitai roa a'e ia : « E ia hinaaro noa'tu taua i te û na aiu mâ i te hoê taime vero rahi, e hoê noa iho rave'a e tae ai au i te fare toa maori râ, te faahorora i te hoê pereoo pani? »

Pahono mai nei ta'na vahine ma te ataata e, « Mai te mea e, e hoo mai taua i te hoê pereoo pani apî, aita ia ta taua e moni faahou no te hoo mai i te

û—no reira, eaha ia te faufaa na taua ia haape'ape'a no te haere i te fare toa i te hoê taime fifi ! »

Ua tamau noa raua i te tau'aparau e i te pae hopea ua faaoti a'era raua e hoo mai i te pereoo. Aita i maoro te roaaraa mai te pereoo apî, ua hinaaro to'u hoa e tamatamata i te faufaa o teie pereoo no te haapapû i te mau tumu i hinaaroo ai oia e hoo mai i te reira pereoo. No reira ua opua a'era oia e haere e tapu i te raau ei vahie no te tahu auahi no te fare. E pu'e tau haapoheraa raau teie taime, e ua haamata a'ena te hiona i te topa i ni'a i te mou'a ta'na e mana'o ra e haere e imi i te raau. A tere noa ai oia i roto i te mou'a, haere noa'toa te hiona i te me'ume'uraa. Ua ite a'era to'u hoa e, e mea ataata ia tere na ni'a i te purumu heehee, tera râ, ua tamau noa oia i te tere, no te mea, e ti'aturi rahi to'na i ni'a i teie pereoo apî.

Te fifi râ, ua haere atea roa pa'i oia na ni'a i te purumu hiona. Ua tere oia i rapae i te purumu i te vahi ta'na i faaoti e tapu i te raau, e i reira ua mau to'na pereoo. Ua ohu noa te mau huiira o te pereoo apî i roto i te hiona aita râ te pereoo e tere. Ua ite oioi

a'era oia e, aita oia i ite nahea ia tatara ia'na i rapae i teie fifi. Ua au ore rii oia e te pe'ape'a atoa.

Ua faaoti a'era to'u hoa e, « Eita vau e parahi noa i ô nei. » Ua pou maira oia i rapae i te pereoo e ua haamata i te tapu i te raau. Ua faatomo roa oia i te muriraa o te pereoo i teie pu'eraa vehie teimaha. I muri iho ua faaoti a'era to'u hoa e, e tamata oia i te faatere faahou i te pereoo no te iriti mai i rapae i te hiona. A faatere ai oia i te pereoo, ua haamata oia i te nuu rii i mua. Ua nuu marû noa te pereoo i rapae i te hiona e tae roa mai i ni'a i te purumu. E i te pae hopea ua ti'a ia'na ia ho'i i te fare, ma te oaoa e te aau haehaa.

## Ta tatou hopoi'a tata'itahi

Te pure nei au ia tauturu mai te Varua Maitai ia'u i te faa'iteraa'tu i te tahi mau haapiiraa faufaa rahi o ta tatou e nehenehe e apo mai na roto mai i teie aamu no ni'a i to'u hoa, te pereoo uira e te raau. Na te teimaha. Na te teimaha o te raau i faati'a i te umeraa no te haamahuti ia'na i rapae i te hiona, no te ho'i mai i ni'a i te





purumu, e no te tere faahou. Na te teimaha i tauturu ia'na ia ho'i i roto i to'na utuafare e i to'na fare.

Te amo nei tatou tata'itahi i te hoê hopoi'a. Ta tatou hopoi'a tata'itahi o te mau tauraa ia e te mau rave'a, te mau faahoporaa e te mau fana'oraa, te mau ati e te mau haamaitairaa, e te mau ma'itiraa e te mau haavîraa. E piti uiraa arata'i o te nehenehe e tauturu ia tatou a hi'o tamau ai tatou e na roto i te pure i ta tatou hopoi'a : « Te faatupu ra anei teie hopoi'a ta'u e amo nei, i te umeraa pae varua o te tauturu ia'u ia haere i mua, ma te faaroo i te Mesia, i ni'a i te e'a afaro e te piriha'o, ma te ore e mau ? Te faatupu ra anei teie hopoi'a ta'u e amo nei i te umeraa pae varua e faati'a ai ia'u ia ho'i i te fare o to'u Metua i te Ao ra ra ? »

I te tahi taime e ti'aturi hape tatou e, te oaoa o te oreraa ia e amo i te hopoi'a. Tera râ, e titauhia ia amo i te hopoi'a e ua riro te reira ei tuhaa faufaa no te faanahonahoraa o te oaoa. E mea titauhia ia faatupu ta tatou hopoi'a tata'itahi i te umeraa pae varua, no reira, e ara maitai eiaha tatou e tari

i roto i to tatou oraraa i te mau mea nehenehe e rave rahi roa e te faufaa ore ho'i, a riro te reira i te faanevaneva e i te ruri ê ia tatou i te mau mea faufaa roa a'e.

### Te mana haapuui o te Taraehara

Na ô maira te Faaora :

« E haere mai outou ia'u nei, e te feia atoa i haa rahi, e tei teiaha i te hopoi'a, e na'u outou e faaora.

« A rave mai i tau zugo i ni'a ia outou, e ia haapiihia outou e au, te marû nei ho'i au e te haehaa o te aau : e e noaa ho'i te ora i to outou varua.

« Te marû nei ho'i ta'u zugo e te mêmâ nei ta'u hopoi'a » (Mataio 11:28–30).

Te hoê zugo, e raau tarava ia, o te faaohipahia i rotopu e piti puaatoro e aore râ, te tahi atu animala ei reira e ti'a ai ia raua ia huti amui i ni'a i te hoê hopoi'a. Na te zugo e tuu i te mau animala te tahi i piha'i iho i te tahi ei reira e ti'a ai ia raua ia haere amui no te faaoti i te hoê ohipa.

A feruri na i te titaaraa manihini taa ê roa a te Fatu ia « rave mai i tau zugo i ni'a ia outou. » Ia rave e ia

haapa'o tatou i te mau fafauaa mo'a, na te reira e taamu ia tatou i ni'a i te Fatu ia Iesu Mesia. Te auraa mau, te titau manihini mai nei te Faaora ia tatou ia ti'aturi Ia'na e ia huti amui e o O'na, noa'tu e, aita ta tatou tautooraa maitai roa a'e e aifaito i Ta'na, e eita roa ihoa e faaauhia i Ta'na. Mai te mea e, e ti'aturi tatou Ia'na, e e huti tatou i ta tatou hopoi'a e o O'na i roto i te tahuti nei, e mea papû roa e, e mea marû Ta'na zugo e e mea mêmâ ta'na hopoi'a.

Aita tatou i vai otare noa e aita roa'tu e titauhia ia tatou ia vai otare noa. E nehenehe ta tatou e haere i mua i roto i to tatou oraraa i te mau mahana atoa na roto i te tauturu no te ra'i mai. Na roto i te Taraehara a te Faaora e nehenehe ta tatou e farii i te aravihi e te puai « hau atu i to [tatou] iho » (« Pee au ia oe », *Te mau himene*, n°131). Mai ta te Fatu i parau ra, « No reira, a haere noa i to orua tere e ia oaoa ho'i to orua na aau ; no te mea inaha, e a hi'o na, tei piha'i iho ia'au ia orua e tae noa'tu i te hopea ra » (PH&PF 100:12).

A haamana'o na i te hi'oraa i roto i te Buka a Moromona a hamani ino ai Amulona ia Alama e i to'na mau taata. Ua tae maira te reo o te Fatu i teie mau pipi i to ratou vai-ati-raa ra : « E faateitei na outou i te upoo, ia mahanahana maitai, ua ite ho'i au i te parau faaau ta outou i faaau mai ia'u ra ; e faaau atu ho'i au i te faufaa i to'u ra mau taata, e faaora'tu ho'i ia ratou i te titiraa » (Mosia 24:13).

A hi'o i te faufaa o te mau fafauaa no te parau fafau no te matararaa i te tîtiraa. E mea faufaa ia fariihia e ia faaturahia te mau fafauaa ma te parau ti'a, e ia ravehia ho'i te mau oro'a na roto i te haamanaraa autahu'araa ti'a, ei reira e roaa mai ai te mau haamaitairaa atoa o te Taraehara a Iesu Mesia. No te mea, na roto i te mau oro'a o te autahu'araa te mana o te huru Atua e faa'itehia mai ai i te tane e te vahine i te tino tahuti nei, oia atoa ia te mau haamaitairaa o te Taraehara (hi'o PH&PF 84:20–21).

Haamana'o na i te parau a te Faaora « Te marû nei ho'i ta'u zugo e te mêmâ nei ta'u hopoi'a » (Mataio



11:30), a hi'o ai tatou i te irava i muri nei i roto i te aamu o Alama e to'na mau taata.

« E na'u ho'i e haamâmâ i te mau hopoi'a teiaha i tuuhia i ni'a i to outou taponu, eita roa o to outou taponu e mauui » (Mosia 24:14).


E rave rahi o te feruri e, te parau nei teie irava e, e iriti-oioi-ê-hia te hopoi'a e e faaore-roa-hia. Tera râ, na te irava i muri nei e faataa mai e, e mea nahea te hopoi'a i te haamâmâraahia.

« I haamâmâhia ihora te mau hopoi'a i tuuhia mai i ni'a iho ia Alama e to'na ra mau taea'e ; oia ia, *na te Atua ratou i faaitoito*, i ti'a'i ia ratou i te faaoromai i te mau ati ma te paruparu ore, e ua auraro ihora ratou ma te aau tae e te faaoromai i te hinaaro atoa o te Fatu » (Mosia 24:15 ; reta tei faahuru-ê-hia).

Aita te mau hopoi'a e te mau fifi i iriti-oioi-hia mai ni'a'tu i te taata. Ua faaitoitoia râ Alama e to'na mau taata, e no te mea ua puai a'era ratou, i mâmâ ai te hopoi'a. Ua haapuiahia teie mau taata maitai na roto i te Taraehara no te *rohi* ei mau ti'amana (hi'o PH&PF 58:26–29) e no te *rohi* no to ratou maitai. E « ma te puai o te Fatu » (Te mau parau a Moromona 1:14 ; Mosia 9:17 ; 10:10 ; Alama

20:4), ua arata'ihia Alama e to'na mau taata i te vahi hau i roto i te fenua o Zalahemela.

Eita te Taraehara a Iesu Mesia e faaupooti'a noa i ni'a i te mau fifi o te Hi'araa o Admau e ia faatupu ho'i i te faaoreraa o ta tatou iho mau hara e ta tatou mau ofatiraa ture, e faati'a atoa râ Ta'na Taraehara ia tatou ia rave i te maitai e ia riro ei taata maitai a'e i ni'a atu i to tatou mau aravihi tahuti nei. Te rahiraa o tatou tei ite e, ia rave ana'e tatou i te mau ohipa hape e ua hinaaro tatou i te tauturu no te upooti'a i ni'a i te mau fifi o te hara i roto i to tatou oraraa, ua faati'a te Faaora ia tamâhia tatou na roto i To'na mana faaora. Tera râ, ua ite atoa anei tatou e, no te mau tane e te mau vahine haapa'o maitai te Taraehara, te feia haapa'o, te feia ti'amâ e te afaro, e o te tutava nei ia riro ei feia maitai a'e, e ia tavini ma te haapa'o maitai roa'tu ? Te uiui nei to'u mana'o e, te manuia ore nei anei tatou i te ite hope i teie huru faaitoito to te Taraehara i roto i to tatou oraraa, e aita anei tatou e ti'aturi hape noa nei e, na tatou iho e amo i ta tatou hopoi'a o tatou ana'e—na roto i to tatou iho itoito, to tatou iho puai, e to tatou haapa'o e to tatou iho mau aravihi iti.



E mea maitai ia ite e, ua haere mai Iesu Mesia i te fenua nei ia *pohe* no tatou. Tera râ, e titau-atoa-hia ia tatou ia mauruuru i te mea e, te hinaaro nei te Fatu, na roto i Ta'na Taraehara e na roto i te mana o te Varua Maitai, ia *horo'a i te ora* ia tatou—eiaha i te arata'i noa ia tatou, ia haapuiai atoa râ e ia faaora i to tatou mauui.

#### **E tauturu te Faaora i To'na mau taata**

Ua faataa mai Alama e, no te aha e e mea nahea te Faaora e faati'a ai ia tatou :

« E e haere atu oia ma te faaoromai i te mauui, e te ati, e te mau huru faahemaraa atoa ra ; e e na reira oia ia faatiaha te parau tei na ô maira e, E rave oia i te mauui e te mau ma'i o ta'na mau taata ia'na iho.

« E e faaoromai oia i to'na poheraa, i tatarai oia i te mau tape'a o te pohe i ruuruuhia i to'na ra mau taata ; e e rave oia i to ratou paruparu i ni'a ia'na iho ia faa'ihia to'na ra aau i te aroha i au i te tino, ia ite oia na roto i te tino i te rave'a e faaora'i i to'na mau taata i to ratou paruparuraa ra » (Alama 7:11–12).

No reira, ua mauui te Faaora eiaha no ta tatou noa mau hara e ta tatou mau hapa—no to tatou atoa râ mauui o te tino e te ahoaho, to tatou mau paruparu e te mau hapehape, to tatou mau mata'u e te mau au ore, to tatou mau inoino e te mana'o paruparu, to tatou mana'o oto e te tatarahapa,



to tatou hepohepo e te tapineva, te ohipa ti'a ore e te aifaito ore e topa i ni'a i tatou, e te mana'o oto e haape'a-pe'a nei ia tatou.

Aita e mau i tino, aita e ati varua, aita e ahoaho e aore râ, e aau oto, aita e ma'i e aore râ paruparu ta outou e aore râ, ta'u i faaruru i roto i te tahuti nei e, aita te Faaora i farii na mua. I te hoê taime paruparu ua ti'aoro paha tatou e, « Aore e taata i ite. Aore e taata i haro'aro'a ». Tera râ, ua ite papû roa te Tamaiti a te Atua e ua haro'aro'a ho'i, i te mea e, ua ite Oia e ua amo ho'i i ta tatou tata'itahi mau hopoi'a. E no Ta'na tusia faito ore e te mure ore hoi (hi'o Alama 34:14), e mana'o papû To'na i te tahi, e e nehenehe Ta'na e faatoro mai i To'na rima no te here. E nehenehe Ta'na e toro mai i te rima, e tape'a mai, e tauturu mai, e faaora, e e haapuai mai ia tatou ia riro ei taata hau atu i te ti'a ia tatou iho ia riro e ia tauturu ia tatou ia rave i te mea o te ore roa e oti ia tatou ia rave na roto noa i to tatou iho mana. Oia mau, e mea marû ta'na zugo, e te mômâ Ta'na hopoi'a.

**Hoê titauraa manihini,  
hoê fafauraa e hoê iteraa papû**

Te tita manihini nei au ia outou ia tuatapapa, ia pure, ia feruri maite e ia tutava i te haapii hau atu no ni'a i te Taraehara a te Faaora a hi'o ai outou i ta outou iho hopoi'a. E rave rahi mau mea no ni'a i te Taraehara eita tatou e taa na roto noa i to tatou feruriraa tahuti nei. Tera râ, e rave rahi tuhaa o te Taraehara e nehenehe e e ti'a ho'i ia tatou ia maramarama.

No to'u hoa, na te teimaha o te raau i horo'a i te umeraa faaora. Aita



e ti'a i te pereoo tomo ore ia tere na ni'a i te hiona, noa'tu e, e maha huira tura'i. E mea titauhia ia faatomo i te pereoo no te faatupu i te umeraa.

Na te teimaha. Na te teimaha i horo'a i te umeraa e ti'a ai i to'u hoa ia mahuti mai, ia ho'i faahou i ni'a i te puromu, ia haere i mua, e ia ho'i i to'na utuafare.

Na te mau hopoi'a teimaha i roto i to tatou oraraa e tauturu ia tatou ia ti'aturi i ni'a i te mana, te aroha e te maitai no te Mesia Mo'a (hi'o 2 Nephi 2:8) Te faa'ite papû nei au e te parau fafau atoa nei au e, e tauturu mai te Faaora ia tatou ia amo i ta tatou hopoi'a ma te haamâmâhia (hi'o Mosia 24:15). Ia taamuhia tatou i ni'a Ia'na na roto i te mau fafauraa mo'a e ua farii tatou i te mana faati'a o To'na Taraehara i roto i to tatou oraraa, e riro tatou i te imi tamau noa no te haro'aro'a e no te ora mai te au i To'na hinaaro. Ia pure atoa tatou no te puai no te apo mai, no te tau i e aore râ, no te farii i te huru o to tatou oraraa, eiaha râ e pure ma te tuutuu ore i te Atua no te tau i to tatou huru oraraa mai te au i to tatou hinaaro. Ua riro atura tatou ei feia rohi, eiaha râ ei tao'a o te faa'ohipahia (hi'o 2 Nephi

2:14). E haamaitaihia tatou i te umeraa pae varua.

E mata na tatou i te rave maitai a'e i te ohipa e ia riro ei taata maitai a'e na roto i te Taraehara a te Faaora. O te 6 no eperera teie mahana. Ua ite tatou na roto i te heheuraa e, o teie mahana te tai'o mahana mau e te ti'a no te fanauraa o te Faaora. O te 6 no eperera atoa te tai'o mahana no te faati'araahia Te Ekalesia a Iesu Mesia i te Feia Mo'a i te Mau Mahana Hopea Nei. (Hi'o PH&PF 20:1; Harold B. Lee, « Strengthen the Stakes of Zion », *Ensign*, July 1973, 2 ; Spencer W. Kimball, "Why Call Me Lord, Lord, and Do Not the Things Which I Say?" *Ensign*, Me 1975, 4 ; Spencer W. Kimball, « Remarks and Dedication of the Fayette, New York, Buildings », *Ensign*, Me 1980, 54 ; *Discourses of President Gordon B. Hinckley, Volume 1: 1995–1999* [2005], 409.) I teie mahana Sabati mo'a taa ê, te faa'ite nei au i to'u iteraa papû e, o Iesu Mesia to tatou Taraehara. Te ora nei Oia e e tâmâ Oia, e faaora i to tatou mau iui, e arata'i, e paruru e e haapuai Oia ia tatou. Te faa'ite papû nei au ma te oaoa i teie mau mea na roto i te i'oa mo'a o Iesu Mesia ra, amene. ■